

---

## ҚУВА ТУМАНИДА ИШЛАБ ЧИҚАРИЛАЁТГАН ТАЙЁР ТИКУВ-ТРИКОТАЖ МАҲСУЛОТЛАРИ ХОРИЖДА ҲАМ ХАРИДОРГИР БЎЛМОҚДА

Вилоят ҳокими Хайрулло Бозоров Қува туманидаги “Қува текстил” масъулияти чекланган жамияти фаолияти ҳамда у ерда амалга оширилаётган янги лойиҳалар билан ҳам танишди. “Ўзбек” МФЙда жойлашган ушбу йирик корхона бугунги кунда 40 минг тонна пахтани қайта ишлаш ҳисобига калава-ип маҳсулотлари ишлаб чиқариш қувватига эга.

2021 йилда лойиҳа қиймати 9,2 млрд. сўмлик тикув-трикотаж цехи ишга туширилиши натижасида қўшимча яна 300 та янги иш ўринлари яратилди ва ишчи-ходимлар 1100 нафардан ошди. Ҳозирда ўз бренди билан Россия, Хитой, Туркия, Қирғизистон, Польша, АҚШ каби давлатларга тайёр маҳсулотлар етказиб бермоқда. 2021 йилда жами 18 млн. АҚШ доллари миқдорида экспорт амалга оширилди.

2022 йилда ҳам тадбиркор ўз маблағи ҳамда хорижий кредит линиялари ҳисобидан 71,7 млрд. сўмлик лойиҳаларни амалга оширишни режалаштирган. Янги тўқув, йигирув ҳамда тикув цехлари ташкил этилиб, 850 та янги иш ўринлари яратилади. Йиллик экспорт ҳажмини 25 млн. АҚШ долларига етказиш мақсад қилинган.

Тадбиркор вилоят раҳбарига кластер ташкил этиш ва корхонани янада кенгайтириш истиқболлари ҳақида ҳам батафсил маълумот берди. Шундан сўнг меҳмонлар бу ердаги ишлаб чиқарилаётган маҳсулотлар билан танишдилар.

Ўрганишлар давомида тумандаги “Баҳор” МФЙ ҳудудида турк сармояси иштирокида ташкил этилган “Гурер” МЧЖдаги трикотаж маҳсулотлари ишлаб чиқариш жараёнлари кўздан кечирилди.

Лойиҳа қиймати 1,2 млрд. сўм бўлган ушбу корхона 2021 йилда иш бошлаган. 114 минг доллар тўғридан-тўғри хорижий инвестиция маблағлари сарфланиб, ишга туширилган корхонада ҳозирда 80 нафардан зиёд хотин-қизлар меҳнат билан банд. Вилоят раҳбари корхона имкониятидан келиб чиқиб ишчиларни 300 нафардан ошириш чора-тадбирларини кўриш юзасидан ўз тавсияларини берди.

[Бизни ижтимоий тармоқларда кузатинг Facebook, Telegram, Facebook, YouTube, Instagram](#)

2022-01-19 12:16:13